

長沙府嶽麓誌

長沙府嶽麓志卷之四

大中丞丁泰巖先生鑒定

郡丞山陰趙 孟纂修

藝文

世之有文章猶星漢經天川岳緯地不朽之盛事也岳麓名勝先儒旣多芳躅二氏亦有靈蹤昔賢之經其地者莫不有珠璣金石之遺焉况乎岫嶺一碑且爲漢唐人所不及見垂至今日豈非星漢川岳所共不朽者乎茲本舊志更加

博採自唐宋以迄

昭代諸所作者聞見所及悉爲編次各以類分而  
禹碑則特冠於首昭聖謨也昔司馬遷作史記  
直欲藏之名山而二酉亦爲周穆王藏書之所  
雕龍繡虎固當與嶽秀湘靈并永也作藝文志



精強 胃氣 固齒 壯筋骨  
 榮經 養血 益氣 壯精神  
 精強 胃氣 固齒 壯筋骨  
 榮經 養血 益氣 壯精神  
 精強 胃氣 固齒 壯筋骨  
 榮經 養血 益氣 壯精神

會稽祁  
 曜穀  
 妙手

譯註辨跋

禹碑譯文

明新都楊慎識

承帝曰咨翼輔佐卿洲渚與登鳥獸之門參身洪  
流而明發爾興久旅忘家宿嶽麓庭智營形折心  
罔弗辰往求平定華嶽泰衡宗疏事哀勞餘仲禪  
鬱塞昏徙南瀆衍亨衣制食備萬國其寧胤舞永  
奔

又譯文

明靖陽沈鎰識

承帝曰咨翼輔佐卿水處與登鳥獸之門參身魚

池而明發爾興以此忘家宿嶽麓庭習營形折心  
罔弗辰往求平定華嶽泰衡宗疏事哀勞餘仲禮  
羸塞昏徙南暴昌言衣制食備萬國其盜風舞蒸  
奔

釋義 沈註

禹夏之神人名文命顓頊之後鯀之子舜之臣  
也禹承舜帝命已曰嗟者言可嗟歎之事下文  
水患是也舜言禹乃我馮翼輔佐之卿所當與  
同憂者今水懷山襄陵九州一壑是所處者皆

在水中與所登者皆鳥獸所登之門何異參身  
於魚池之中卽劉子言微禹吾其魚之意此皆  
爲可嗟之事也因戒禹當明發不寐早夜興起  
以除此害以上述舜命禹之詞於是禹承此命  
乃急於救民故三過其門不入八年於外不歸  
以此忘家而來宿於嶽麓之庭也是以勞心焦  
思則智營矣手胼足胝則形折矣辰時也是也  
言此心無時不在於是必欲往求天下之平定  
而後已所以華嶽泰衡之名山無處不到也宗



主也疏導也事治冰之事也哀聚也言所主疏導之事雖則聚於一身朕山川之神柴望之禮不可不舉故於勞苦之餘亦當少伸禮祀之誠也羸水之充斥處也塞水之壅遏處也昏下民皆墊者也今此三瘡之害旣徙是險阻旣遠則水患除矣於是南荒之地始可以暴其昌言以淑諸民性卽詩陳常于時夏之意使之衣有所制食有所備不致有祁寒阻饑焉而萬國以之咸宥矣末言鼠乃昆蟲之細其性穴處而惡濕

今水患既除則得以安於穴處眾鼠亦知樂舞而各有所奔投無復昔日溺沒之患矣卽鳥獸咸若百獸率舞之意必言鼠者據時所見而言蓋鼠雖至微亦有所處而樂則大者可知矣亦禹貢言陽鳥攸居之意也初鎡得此刻也夜焚香而祝曰神禹聖人也如其有靈也俾某識之兆諸夢焉是夜夢有一長人挈一古餅授鎡其色黃其高尺許上方下圓腹外有金環者四其口旁橫書三字曰某官造下有篆文悉如龍蛇

草木之形瘠而忘首一字及旦起誦碑文恍若  
素識不勞深索因竊為註釋以志之非敢自欺  
以欺人也

釋文

明 南昌楊時喬識

承帝令襲翼為援弼

一句四  
字讀

欽塗陸登島瀾端鄉

邑

三句三  
字讀

仔麓流船暗歇遲眠卽風迄冬次嶽麓

展

音田

陌裂嶽析

音教

罔墮纏往求出竅華恒泰衡

嵩陞事哀獻桴挺禪鬱濟墊徙南暴惛員節別界

聯魍魅夔魍魎舞蒸彝

十五句  
四字讀

釋義 楊註

大禹言承帝舜令襲父鯀治水之任汝翼汝爲  
汝援汝弼于時欽哉首于起塗行陸以冀州帝  
都當先者登海中山島海沿鹵蕩荒度其治之  
之事其序發始於一鄉旣而各邑卽書勦土隨  
山刊木奠高山大川者以一日言曰初子刻資  
次順流之船卽書乘四載者日落昏刻乃暮夜  
過期乃眠以一歲言作速於早歲竟業於歲終  
卽書娶於塗山辛壬癸甲啟呱呱而泣予弗子

者以四方言次南嶽山麓而止住得其山水南北條境導之則見大白澤傾壤高平岡崩折卽書湯湯洪水方割蕩蕩懷山襄陵浩浩滔天水逆行泛濫於中國蛇龍居之民無所定者民被患害羣聲大叫卽書下民昏墊下民其咨者下者卽地阜爲巢上者卽山巔爲營苟有通明處棲寓焉將以爲民除此患胼手胝足而往爲圖謀去乎竅總自西嶽華山北嶽恒山東嶽泰山南嶽衡山中嶽嵩山周遭盡處無一不到平治

事始用集成卽孟子掘地注之海驅蛇龍放之  
菹水由地中行險阻旣遠鳥獸害人者消朕後  
人得平土而居中國可得而食者於是爲鼎鬲  
以民間耕種所得谷粟去皮取實恭捧祭告報  
成於上帝卽書暨益奏庶鮮食稷奏庶艱食鮮  
食懋遷有無化居烝民乃粒者從茲名山大川  
凡洪漲處爲水石所壅遏鬱未舒者皆疏導之  
巖崖所墜下墊未平者皆徙去之卽書萬邦作  
乂者此後凡南方日照明盛之地風聲文命政

令皆暨以車輶轉運財賦達於帝都卽書六府  
孔修庶土交正慎財賦咸則三壤成賦中邦五  
百里甸侯綏要荒五服所謂因地制宜明經理  
以通貢道者也又節制割辨分爲經界合而疆  
聯卽書弼成五服至於五千州十有二師外薄  
四海咸建五長所謂辨方正位定疆域以奠民  
居者也尙以衡山外素稱鬼方火金惟爲魑草  
木怪爲魍土石怪爲夔山澤怪爲魑凡能爲氣  
稜爲災害爲妖習者皆驅逐之其形逃匿一參

一差相比而遠去潛消之其火蟬蛻倏發倏熄  
消滅而至盡無復爲民物患則荒榛幽暗之地  
盡闢卽書山川鬼神亦莫不寔鳥獸魚鼈咸若  
地平天成者是也當八年於外三過其門而不  
入今將立圭告成之時書此碑以紀成功以鎮  
鬼怪卽書南暨吳越春秋所謂安山治水之紀  
是也又古聖人爲文皆韻碑七十七字凡二段  
首段五句前二句句四字後三句句三字以襲  
彌陸渥言巴爲韻五仄聲次段自仔麓至末十五句



句四半以船眠展纜衡禮員聯彝爲韻九平聲  
所謂律律卽韻韻卽歌歌卽書九功惟敘九敘  
惟歌勸之以九歌俾勿壞者是也大旨卽書儆  
戒毋虐毋若丹朱傲予思日孜孜六府三事先  
治諸章同意乃書存此獨未錄今讀之則尊君  
命蓋父愆敬天享神安民阜物錫貢奠居除怪  
開荒中外咸歸一統而兢業儆戒憂勤惕厲之  
心保治圖安之政無一念一刻不在於民乃若  
文詞精卓聲調和諧敘事豐贍卽書懋德嘉績

昌言汝惟不矜不伐天下莫與爭功爭能者可  
槩見焉萬古思禹功者覩河洛又觀此碑乃知  
古帝王御世平治艱難後世願治之君志學之  
士時爲誦讀爲箴規不得以山水遊玩文詞字  
畫參視之焉卽所裨於治學者巨也

禹碑辨

吳道行

攷吳越春秋載禹登衡山夢蒼水使者授金簡玉  
字之書得治水之要刻石山之高處禹碑所從來  
矣歷千百年無傳者道士偶見之韓文公劉禹錫  
索之不得致形之詩詞宋嘉定初何子一遊南嶽  
遇樵者導引至碑所始摹其本過長沙轉刻之嶽  
麓山頂隱秘又四百年至於國朝嘉靖初潘太守  
搜得之剔土榻傳朝野始獲睹虞夏之書故湛甘  
泉一見亟稱篆法奇古雖深於古篆者僅能辨一

二字不可識其中所云深信爲禹筆獨帝禹刻三字則宋人所題耳顧東橋則謂禹精於水今篆體皆流水形其出禹筆無疑但衡石疎厲碑必剝落或亦宋人流傳榻本耳蒲陽林巽峰則謂字畫奇古非秦漢一體文字雖石鼓文原父鼎器銘且讓焉朕古文自漢知者已稀其義失傳未詳何謂季彭山亦謂別有隱義未可知惟是楊升菴沈靖陽各有譯義乃蔡季二公隨執譯義力辨其非禹筆余嘗細玩碑刻反覆古今詩詞序論益信爲禹筆

無疑竊惟譯詞之誤適以開反古者之疑局故辨之者合宜譌譯詞之誤不應泥譯詞而疑非禹之碑試卽以後人所疑者辨之而猶覺所疑之非也據蔡公以衡嶽志載禹碑二岫嶠雲密子一傳本後稱碧雲此非子一之言乃張光叔代敘耳其非一又以勒石見德禹所深戒古人祭告則有之登封鐫石則未季公亦以周穆王宣王始有石刻攷白虎通載禹與周成王封泰山禪會稽首社勒石蓋王者受命必封山增高也禪者增厚也刻石紀

號著已効績也又何似必禹之不勒石也其非三  
蔡又以碑勒自禹嶽麓名自宋徽夫嶽麓之名自  
宋真宗時賜額載在綱鑑長篇及南軒諸記而以  
爲徽宗則嶽麓舊志引衡嶽志所傳而未之深攷  
也其非三且謂韓公索之不得歐趙朱深於博古  
者皆未見而疑道士之見子一之傳爲誑湛甘泉  
所云宇宙神物固當天寶地藏藏久則必復見安  
知道士樵者非山靈異人而使之見者也况原碑  
在深山窮谷荆莽沙土迷覆已久搜之人又安肯

一一窮心力而必欲得之耶其非四如以此四者而疑非禹筆恐博識者不盡狀至謂岫嶠在衡嶽麓在潭碑勒岫嶠詞稱嶽麓爲謬戾此其說近是總之亦楊沈二公譯義之誤當日止從潘公獲碑嶽麓起見亦不自覺碑勒岫嶠詞稱嶽麓之爲非也則其餘譯義之誤可類推已奈何不譯義之是議而徒偏執以爲非禹碑則亦不情甚矣况季公轉以此碑勒之會稽又何過於好奇若此善乎通志有云是書爲蝌蚪其爲禹所遺無疑但其文義

缺之可也



大禹碑跋

江有溶

各向郡人

按張光叔遊宦紀聞述宋嘉定壬申何賢良予二  
得禹碑於岫嶠峰何過長沙遂摹刻於嶽麓書院  
後巨石此禹碑至於長沙之始也朕前此碑在岫  
嶠時經千餘歲未有傳者至唐中年韓文公始述  
道士所見形之於詩此道士現身說法非人間羽  
流可知迄文公搜尋此碑千索萬索竟不得見故  
其詩曰事嚴跡闕蓋知其爲神物也自岫嶠有此  
碑僅一道士見之告之文公文公不得見留此一

詩爲千載後人眼目知此碑有必出見之目也由  
唐迄宋經數百年何子一摹刻之後碑仍隱秘歷  
宋元明又數百年至明嘉靖癸巳郡守潘公疊峰  
因樵子傳播披榛剔蘚榻傳世間而長沙鄉賢熊  
公元性夙號淹博於藝林中拈出張光叔遊宦紀  
聞一則狀後禹碑來歷確有攷據海內爭奉爲神  
物矣溶故曰道士也韓文公也何子一也張光叔  
也潘疊峰也能元性也皆禹碑功臣也今觀刻禹  
碑石硃磧特甚何以經久不泐又碑在岫嶺何以

嚴闕不傳在嶽麓則傳善乎湛甘泉云宇宙內神  
物天寶而地藏之藏久則必復見顧東橋云禹精  
於水其篆體皆流水形昔之人所以讚揚闡發者  
至矣若其譯義則有楊升菴沈靖陽楊時喬三家  
未知孰當今皆尊信升菴譯文併禹碑歌以備攷  
云

賦

嶽麓賦

明 吳道行

嶽胎靈於赤煒兮煥南極以奠朱陵銓物彙而挺  
駭兮望九面而踞湘濱亭洪秀以干霄兮丹崖玉  
削簇嵐靄而迴合兮青嶂鱗層肱金牛兮啓玉屏  
天馬花兮橘洲襟雲母燦兮瑛瑩圭峰插兮黃金  
昭陵笏卓兮紫葢焰霽重湖灝莽兮靳江洞泓昏  
墊疏平成奏擁雲門開雪竇染絳霞爰紫岫曇錫  
飛兮曹溪九還抱兮勾漏士築清兮帷薜載張幌

今廬簫粵惟宋代封肇文昌光耀六幽表正朱張  
飭蓀壁兮椒舍和蘭橈兮蒨房森栢幹兮松檮洗  
竹苞兮枏芳深洲蔚岳繹繹樞樞紛綸絡繹我明  
惟皇高詰霞茂絕炤雲翔靜一流競名登于堂活  
流新綠好山自蒼古懷罔覲來思徬徨索遺邱紫  
陽之蹟揚微湘百泉之芳吁嗟乎書闕簡脫昔王  
所閔得見君子闕里所欣而乃閣翼翼堂振振俶  
疇鼓而奮拔茲胡抑而繼淪詠幽州之歌誦山陰  
之文一觴一咏獨有感於斯亭夫日光旦開月華

夕被生生至聖之容抑抑大賢之配清風發卷帙  
之香硯石著聽瞻之畏莫隱惟昭莫尊而麗漢史  
觀堂而動心唐元經魯而興喟其不足振素懷兮  
俯仰嗣崛起乎絕廢耶首重搔兮赫曦衣載振兮  
翠微漈石火兮洞虛疑仙馭兮襲肌望拽舟兮痕  
異信禹績兮孔巍篆立秘兮嵐碣鬼青赤兮莫窺  
虹光逼豎黛影橫彌江流練白帆駛萍劇漁竿蛤  
點欸乃歌岐氣鬱葱兮四遠色晦明兮陸離渺世  
界之廣誕森萬象其歲蕤削傾崖以千尺展石茵

而托枝望衡造集拜者不疑矚烟雲兮映發禪鐘

磬兮參差閣嶠寺巉兮互答臺阿宮甌兮競奇疑

泉憶鶴訪絕追題風清峽峽蘭放潛溪石鑿鑿兮

白激谷勿勿兮青披幼竹洗雨花微古香若吹仙

子如歸射臺庾而武寂道鄉免而文弛振淪曷旣

擁勝情移或山而勢或水而招或石而競或林而

挑如逢佳士如挹故交牧詠猶兮嵐步麓古農字隱

見兮雨交或睡如冬或妝如秋叶遙切或夏如滴或

春如笑叶思切若乃色色兮日遲聲聲兮風惠書帶

湧兮波香文章燦兮生意石頌

古髮字

被兮煙鬟水

簾靜兮月姊華吉菑沙菜芝絡地老僧箕踞平泉

英佳人澹艷而春醉狂燕耕泥盼

音航也

大平之列

從喜鶯坐柳鬯風流之鼓吹春之春也林酹亞水

穹翠濕衣煖催艷而如熾雲交峯而亂奇湍響崖

縣恍惚冰帷水帛松陰天笑倏俛果氣梅時春之

夏也葩韻枝峯驚桂魂之忽墮紅然蔓嶂疑霜葉

之初明雅標宜月罕徑屯雲茶蘼擷兮陰曉竹鞭

行而時成回雁遺聲乎遠浦窮猿厲響於殘更春



之秋也堤獵獵而飛梨舞霜亂絮水涪涪而懷橘  
幻雪連沙危石糾紛童嶺峙支離之叟草萑

古龍字

盤踞老山橫倩冶之華濤振兮鳥夜雨沸兮人遐  
裘知兮泉栗閱擁兮霧斜春之冬也月歸鐘曉幽  
光凝崖露發花辰香心繞臺旣萬籟之猶寂亦眾  
情之未開春朝之暮也炤回赤岸朝霞夕舸明湧  
寒池游漁戲波發棲烟干邃谷動宿鳥之酣歌春  
暮之朝也地偏自遠心罔弗辰舟旂委化磬折隨  
盍重爲系曰罡風引兮天際賁兮碧漢騁兮九達

瞬兮厥秘啟而待兮罔有傑弗靈兮倚葢坦而渾  
兮扶輿礪而迥兮乃如之人兮參兩而準兮

嶽麓書院賦

查昇

衡嶽綿亘八百里蜿蜒扶輿磅礴鬱積稱於昌  
黎每讀其文輒爲神往丁卯四月旣望旅客星  
沙遙見隔江嶽麓羣峯疊秀林木蓊翳浮柱飛  
甍若隱若見則朱張二夫子書院在焉夫湖南  
當兵燹之後葑屋化離哀鴻遍野自

大中丞丁公鎮撫其地勞來安集旣養且教不三  
年而百堵皆作熙攘駢轡衮衣章甫之歌洋溢  
楚甸而方伯黃公廉使柴公觀察趙公

寅亮協和誠求保赤多士聿興絃歌盈耳乃重  
葺嶽麓書院集四方學者與三楚之秀士講習  
其中而董率鼓舞程材給餼則趙司馬王  
別駕二公之力居多維時

聖天子崇儒右文允大中丞所請

御書學達性天四字

欽命中書二員齎捧而至懸之日百職拜瞻劍珮森  
列烝徒氓隸環觀者以千萬計煌煌乎振振平  
洵

王制之巨麗而希觀之盛典也昇浙汜儒生得與觀  
光乃作斯賦以歌事迹情焉其詞曰

維熊繹之舊封奄南天而域軫控三巴與兩粵  
通六詔於五嶺衡山七十有二峯洞庭三萬六  
千頃若夫九疑五溪三湘二酉武陵百折雲夢  
八九支分縷貫波委雲屬者咸囊括乎四境焉  
伊惟長沙軫旁小星潭州武安唐宋異名俯江  
爲濠負山築城雖卑濕之興嗟寔險要之殊形  
臨高臺而憑弔歎屈賈之猶生羌懷才而抱忠

廼譏言之繁興指數奇而不遇曾今古之異情  
升彼西隅元覽遙矚霞舉泉飛連崗舍谷書院  
有四峙建南北嵩陽睢陽白鹿嶽麓在宋開寶  
潭守所築考亭南軒好道信篤淵源濂洛危微  
嗣續坐皐北而授經樂英才而教育踵韓愈之  
居湖邁文翁之治蜀暨

昭代之鼎興齊水火於菽粟原隰殷賑而流膏閭  
閻旣庶而方穀迨夫逆氣橫厲豕突鴟張小蠹  
弗靖毒流江湖

皇奮神武啟我戎行采入險阻絕其饌糧矢一激而  
首殪築京觀于荆襄嗟黔赤之何辜堆白骨於  
戰場起瘡痍而登衽席寄銷鑰而鞏金湯

帝瞻南楚誰其治之僉曰

丁公左右具宜授以節鉞撫我蒸黎民後來蘇如  
雲如霓蒞茲三載振弊扶衰矢精白於一心凜  
暮夜於四知哀中澤之劬勞拯焚溺於阨危

沛自天之解澤每蠲租而賑饑曾歲月之幾何乃不  
變而雍熙爾其佐化承流曰藩曰臬蒞堂柏府

心水直鐵誰鏡度支清獻風節大法小廉靖其  
正直乃洎守俸允釐庶績撫字用褒蘭絲必黜  
旣鞠育而興咻遂休養而生息比戶可封小子  
有造從邁泮宮載色載笑緬昔賢之講壇寤流  
風之未逸集師濟爲國楨澤華文於霧豹朝誦  
讀而夕絃歌席奇珍而懷異寶詠棫樸於菁莪  
咸執經而問道爰敷

明奏虔達

九重特頒



宸翰舞鳳飛龍並日月而光昭闢造化於鴻濛染玉  
珎而流香訝象管之凌空婉响嘯之豐碑陋飛  
白之未工裊藻繡兮雕楹映金鋪兮璇宮多士  
涉仁而沐義羣黎昭景而飲醴調風雲於律呂  
宴河海於鼓鐘光四表而邁陶唐撫八荒而躋  
黃農誠

熙朝之鉅典稽隆古而未逢是日也晷緯昭應山  
情效靈九華芝秀五色雲呈纖阿爛晃於綺疏  
瑞霧裴褻而綢繡爾乃縫掖薦紳黃童白叟聯

事奉金甌肩交肘擗橋門而聞號尊呼嵩而拜

萬壽兮無疆安排擊兮獻酬爰有勾魅寒軀覩光恐  
後行及而從師聽鶯聲而求友誰見賞於費  
餘願定交於仲曰未得天柱之峯遙望祝融之  
岫儼相豆於羹牆慶遭逢之非偶歌盛治今年  
年頌靈長兮永久歌曰

帝德同天莫與京兮盛烈重光泰階平兮海外服從  
式廓增兮越裳九譯貢寶琛兮維楚有才文教

典兮書院攸崇萃羣英兮

龍章天錫寶墨晶兮治隆化洽喜起廣兮髦士投綬  
訓風行兮是則是倣鼓瑟琴兮瞻雲就日慶盍  
簪兮清崑萬禩一以貞兮

道林寺賦

國朝 趙而休

嶽麓山在長沙城西臨江渚乃衡山七十二  
峯之足山上下皆置書院舊爲朱張講學處  
江岸有道林古寺起於六朝盛於唐闢於宋  
時因紫陽名諸舍人講書其地寺卽中顓昔  
賢詩云此是前朝古書院而今卻作梵王家  
我來登眺不勝慨獨倚東風數落花至明正  
德間寺尋廢而莫可攷噫今日何日復思門  
開洞庭之野殿插赤沙之湖安可得耶余偶

披山徑忽見茅廬驚異交集爰記篇章賦曰  
溯回雁之多奇下絕塵於靈巖晴紫霧以城頭粘  
白波而江腹頂設岫樓之碑面引簷簷之谷想殊  
異於山林豈人間之可以結屋爰有道林盤紆峯  
曲一派水流半房山宿香蒲涼煙光浮慈燭玉泉  
之南於斯稱淑爾乃禪風墜地慧日停虛材分四  
院舊有湘西城南石落重湖珍珠之橋漚滅琉璃  
之井荒蕪雁回峯而無塔鹿啣草以何廚廣殿三  
千盡化火蓮之宅長廊五百空留水苔之峒想毀

祠以正教豈迩墨而歸儒則見雨溜松園霜摧竹  
節苔沒梢雲庭飛米雪牛過法王之牕虎行羅漢  
之穴走異獸於人形藏奇鬼於佛闕異哉此寺廢  
在何年吾聞野老昔最膺妍當楚王之初托甚崔  
嵬於竺乾紅霜濕鴛鴦之瓦丹星綴蜺螭之椽虛  
堂鬱樸方丈迴連寶階霜潔綺壁霞鮮念佛之青  
鳥可聽駝經之白馬翩肱且也帶橘洲環楓浦羅  
八景瞰三川煙鐘互答曙鼓遙連開崖架六刻竹  
流泉對靈花於芷岸收香粟於萸田多南朝之四

百八十勝兆魏之一萬三千頤乃山花普陀僧來  
滄海間持沁暑之珠能穿忍辱之鎧傑立孤嶺從  
修颺靄浴上藏眞誅茅駐彩起寶斃于封巖得殘  
碑於半壘抗五頤以三摩聳孤肩而千載悟麓草  
之可依何湘竹之非自在噫嘻國遊蒼鼠城托紅  
鱗降栢之梁爰爲柳榔翦桐之葉入彼桑薪且教  
傳綺食類涉波旬堂殊東觀之製像塗西域之神  
桑田爲變豈僅玄津昔者客過韋蟾吟憶蒼梧之  
野遊經韓愈詩傳青草之濱壁上風流分留杜老

樹間秋色繼響元人貌茲禪刹猶肇朱垠痛古今  
之泡影幸題咏之璘珣於是占霜樾避火旻花浮  
水葢草列山茵長齋繡佛開偈爲鄰信迹禪中另  
有天地而好靜者絕無冬春不朕構夢懷新爭萬  
里之道反僕僕乎百年之身



風雱亭賦

張 拭

眷岳山之回隩有絃誦之一宮鬱青林兮對起皆  
絕壁之窮窿獨樵牧之往來委榛莽其蒙茸試芟  
夷而欲視翕眾景之來宗擢連娟之修竹森偃蹇  
之喬松山靡靡以旁圍谷竒竒而潛通翩兩翼兮  
前張擁千麾兮後從帶游江之浮綠蠹遠岫兮橫空何  
地靈之久閼昉經始乎令公况棟宇之宏開列闌  
楯之周重撫勝槩以獨出信茲山之有逢予揆名  
而誼義爰遠取於舞雩之風昔洙泗之諸子侍函

夫以從容因聖師之有問各踞陳其所衷獨點也  
之操志與二三子兮不同方舍瑟而鏗然諒其樂  
之素充味所陳之紆餘夫何有于事功蓋不忘而  
不助亦何始而何終於鳶飛而魚躍實天理之中  
庸覺唐虞之遺烈儼洋洋乎日中爲夫子之所與  
豈虛言之是崇嗟學子兮念此邈千載以希踪希  
蹤兮奈何盡務勉乎敬恭審操舍兮斯須凜戒懼  
兮冥濛防物變之外誘遏氣習之內訌浸私意之  
晚落自本心之昭融斯昔人之妙旨可實得於予

躬循黠也之所造極顏氏之深工登斯亭而有感  
期用力於無窮

詩 新典恭紀

四月十六日恭記

丁思孔

運曾皇綱振乾坤文教開聲華繼百代道德統三  
才祿及儒生喬恩從闕里推遐荒爭奮礪率土  
慶昭回霽麓荆榛闢書堂制度恢煥輪新廟貌  
盼蠻起山隈

宸翰從天下經函壓乘來龍蛇飛澤國雲錦爛萃臺  
帝業昭如日嵩呼響若雷山川增氣象碧落絕氛埃  
杞梓千章植芝蘭九畹栽微臣慙朽質忝分育羣

萬年杯

材樞治從甄鑄章縫就翦裁繪天忘絕相望海益  
徘徊星漢丹青迥文章太乙培懷恩知罔極遇上

四月十六日恭紀

趙廷標

阿閣鳳鳴天下曉光華旦旦卿雲繞萬邦風動樂  
時雍峻德文思被四表祝融之位視三公嶽麓叨  
陪望秩同上有岵嶸蜎蜎之遺蹟下有瀟湘洙泗  
之流風流風翳誰續中丞宏作育書院特重新  
請經於天祿輯瑞曾采覲臣言周子諸儒并

推恩至是

親煩宸翰灑龍騫鳳翥貴丘園天文睿藻昭雲

漢甲乙圖書次第燦使星光纏翼軫分岳秀湘  
更巍煥百寮陪位捧龍章飄渺如聞

御座香日月璇題同不朽山川鼎祚共靈長

四月十六日恭紀二十四韻趙甯

帝德隆千古皇風暢八荒顯承兼述作戡定邁成

康偃武干戈戢修文禮樂彰會圖朝萬國鑄鼎冠  
三王體道尊宣聖崇儒幸魯鄉垂裳臨俎豆

釋奠益蒸嘗下詔褒恩渥銘碑紀澤長先民悉推及  
後裔盡官常在野無遺邇盈庭盛拜颺

聖情遊翰墨 睿藻富珪璋師表極推重達天特闡

揚 都俞從牧請璀璨啓 龍光嶽麓雖陪位名

儒宣化方壁奎貞翼軫洙泗號瀟湘自古留遺蹟

于今煥講堂 璇題忽寵昇山色亦輝煌 筆正

窺精一 文明識熾昌翥騫昭日月卷帖炳縹緗

是日和風霽遙天瑞彩翔傳呼擁節使奔走秩鴛

行百辟景 開運小臣儼肅將傾都驚 曠典多

士奮修藏媿乏雲璈奏唯賡 天保章

皇圖鞏百禩 寶厯永無疆

四月十六日恭紀

王駿

仲子

古殿新成金碧妝 天書遙映楚雲黃  
捧來鸞

詔垂霄漢拜下 龍章走驪驪疎雨偏教旌節潤

景風初帶露荷香小臣荒服賡歌舞盥沐驂車肅

後行

其二

八使分行過岳陽和嶠車上載縹緗雲開五色聞



天語書到三湘  
映月光俎豆只今典禮重絃歌白  
古服官長採風郢楚瘡痍甚學道猶知生聚忙  
欽賜嶽麓書院

御書扁額恭紀二十韻

會稽 祁曜徵 朗山

聖代尊儒術名山闢講堂  
峯巒環嶽麓郡郭隔瀟湘  
建置規模遠流傳歲月長  
道心追孔孟學術溯朱張  
絃誦今還盛鐘鏞舊所藏  
星躔分翼軫桃李徧宮墻  
地毓乾坤秀時當運會昌  
輿圖增式廓威武掃欃槍  
禮樂恢虞夏文明邁漢唐  
金繩熒景瑞

玉簡啟殊祥 丹詔臨南楚璇題出 尙方淵褭  
窺 帝德 睿藻揆奎章想見仙毫動猶聞 御  
墨香垂天凌鳳翥煥彩壓龍翔縹緲烟霞境昭回  
雲日光 九重瞻肅穆百辟奉趨蹌使節來蒼水  
頒經下 紫闥士風興薄海 宸翰冠前王萬世  
懸銀榜千秋拱玳梁草茅逢鉅典稽首頌無疆

四月十六日恭紀

張維霖

宸章遙下麓峯頭萬眾嵩呼湧碧流道重朱張新  
棟宇書傳虞夏刻螭虬金題日燦千秋麗玉躋雲

龍五色浮好向此中探秘冊芸香開處擬龍樓

嶽麓書院 二十韻

金德嘉

麗澤今層構名山舊講堂羹牆依孔孟俎豆肅朱  
張衡嶺晴看近江聲夜聽長禹碑傳倒殪宋榭額  
吹香開寶垣墉古淳熙丹雘光人材興郡邑道脉  
亘滄桑典物元明備科條吳李詳理原圖太極學  
總貫程鄉聖代堯文煥賢衢楚甸康 賜書懸嶽  
麓 宸翰灑瀟湘使節青楓浦官迎涿水航庸言  
敷五教掌故溯三王濟濟章縫會彬彬俊乂行儒

聖期鼎鼐雅質視珪璋氣直西京上星占北斗旁  
燃藜忘漏永把卷覺心臧讀可兼丘索詞應勝景  
唐濯纓成朗詠汲井作流觴歲月芸窗靜乾坤蘭  
圃芳赫曦臺數仞闕里遙相望

恭紀盛典

羅人琮

楚水洞庭山衡嶽縱橫八百均寥邈衡峯七十二  
嶽崎嶇麓爲足不可學奇鍾秀毓歸山霧至今楚  
人猶卓卓朱洞創院貯羣書集徒講誦惜三餘膏  
陽應天白鹿洞遂號四大雄方輿山僧列炬道鄉

物類記

鏡冰堂

至敬夫仲晦爲翦除指數名賢副勝地  
先代振興  
艷覩記胡天戰伐苦不休  
宮庭頻遭狐狸戲  
皇路清平兵氣消  
聖主崇文八荒企中丞分陝  
廣菁莪崇弘棟宇照煙螺  
師儒濟濟迤英傑風規  
雅寬劍佩摩珍重  
宸翰來閭闔五雲縹緲垂嵯  
峨寶笈更函石渠帙大道常留中天日  
吾徒幸近  
天子光校書何須問太乙  
文運永並國運隆由來  
繼離所無逸

四月十六日

朱前詒

皇輿休哉泰運昌斗垣煥彩騰瑤光

聖王臨軒勤邦治誕敷文教訖遐荒德業久大梓文  
武

宸翰揮灑驅鍾王在廷臣隣歌喜起在外節鉞綏邊  
疆

天子厯念楚南重特簡仙芝撫沅湘一德一心固邦  
宇十患十漸陳岩廊振興學校播教化重新書院  
紹朱張疏請

御書頒嶽麓勅頒全史名山藏詞臣賁捧馳驛路節

駐星沙羣相望是日晴霞爛如綺照回雲漢文風  
颺學達性天古今秘筆飛翰墨鸞鳳翔銀鈎鐵畫  
垂隆棟玉粹珠圓炳畫梁濟濟冠裳仰璀璨我  
縱掖咸趨踰霜眉乳口訝希覲捺觚執戟忻非常  
共言宋元迄明季七百餘歲重丕倡未聞龍椽書  
院錫而今彬郁推我

皇樗材何幸側逢盛追隨劍履聆鳴璫此日此時人  
共樂一談一笑神俱揚越宿郡中趙司馬雲邀星  
使聯鵷行探奇攬勝選游屐賞心騁目恣徜徉亭

勒程箴嚴視聽傳李字挾風霜蘭亭讌會猶可  
擬道鄉氣節于今曲水及泉昭道體日新時習  
規文場與劇肩輿陟深隩禮真拜篆登崇岡始識  
蚪文七十七夏后書法萬古彰路極意謂盡其景  
谷轉峯廻一徑當斜日半岩開梵宇歸雲擁樹迷  
禪房泉水亂侵青草路鐘聲遙度碧蘿牆坐觀山  
色千層翠遠挹荷花十里香仁威古殿聳北嶼拜  
嶽片石拱南方蕭疎綠竹搖風細蒨蔚蒼余蔭日  
長踞巖遐矚長天勢物象虛無涵渺茫高山流水



看不盡相攜重上君子堂與余問答各有以撫今  
懷古醉斜陽倦飛歸鳥促遊騎共擬乘輿勒紫韁  
憾余莞牧卑濕地四載辛勞類楚狂茲山名勝不  
一睹終朝漁獵簿書忙豈期今日與嘉譙追陪登  
眺攀幽芳敬倩賴生諧其事用昭

聖世謨洋洋尙憶

至尊恩汪濊斯文丕顯邁陶唐

四月十六日恭紀

張廷幹

玉勝頒仙禁璫題寵昔賢簪纓百辟會象緯九天

懸文自開昌運人爭集講筵歡呼山谷裡莫不頌  
堯年

禹碑詩

禹碑

唐韓愈

岫嶺山尖神禹碑字青石赤形模奇科斗拳身薤  
倒披鸞飄鳳泊挈虎螭事嚴跡秘鬼莫窺道人獨  
上偶見之我來咨嗟涕漣洏千搜萬索何處有森  
森綠樹猿猱悲

禹碑

劉禹錫

常聞祝融峯上有神禹銘古石琅玕姿秘文螭虎形

禹碑歌 有引

明楊慎

禹碑在衡山絕頂韓文公詩云云詳詩語始終  
公益至其地矣未見其碑也所謂青字赤石之  
形模科斗鸞鳳之點畫述道士口語耳若見之  
矣發揮稱贊豈在石鼓下哉迨宋朱張同遊南  
嶽訪求復不獲其後晦翁著韓文考異遂謂衡  
山實無此碑反以韓詩爲傳聞之誤云再攷六

一集古錄趙明誠金石錄鄭漁仲金石畧之三  
家者古刻臚列獨不見所謂禹碑者則自晉好  
古者流得見是刻者亦罕矣碧泉張季文得墨  
本于楚持以貺予予乃撫卷而嘆曰嗟乎韓公  
所謂事嚴跡闕鬼莫窺者信乎不朕何三千餘  
年而完整無泐如此何管之晦何今之顯晦者  
何或翳之顯者何或啟之天壽珍物世咸曰卜  
者或未必卜神飫吾嗜不必以生世太晚爲恨  
也已作禹碑歌以紀之雖孱下之詞不足以影

响韓蘇朕聞幽蒐奇繼絕表微固亦二公之雅  
意乎

神禹碑在岫嶺尖祝融之峯凌朱炎龍畫傍分結  
構古螺書匾刻戈鋒鋸萬八千丈不可上仙局靈  
鑰幽以潛昌黎南遷曾一過紛披芙蓉攀水簾天  
柱夜瞰星辰下雲堂朝見陽輝暹追尋夏載赤石  
峻封埋古刻蒼苔黏參科倒薤形已近鸞鳳泊  
辭何織墨本流傳世應罕青字名狀人空瞻永叔  
明誠及來滌集古金石窮該兼臚列箴銘暨款識

橫陳旰飢和釜鬻胡爲至寶反棄置拮據磨蟻捐  
烏蟾又聞朱張遊嶽麓霽雪天風飄佩褱搜奇索  
秘跡欲徧春倡撞和詩無厭七日崎嶇信有覲一  
字膏馥盍忘拈非關嶢嶢阻登陟定是藤葛籠窺  
覷好古予生嗟太晚拜嘉君睨情深忤老眼增明  
若發覆尺喙禁斷如交籍七十七字挈螭虎三千  
餘歲叢蛇蚺憶昔乾坤漏息壤蕩析蒸庶依苓摻  
帝嗟懷襄咨文命鄉佐澤洞分憂悵洲并渚混沒  
營窟鳥迹獸迹交門擔竭來南雲又北夢直罄西

被仍東漸黃熊三足變鯀服白狐九尾歌龐袖後  
乘包湖受玉籙前列溫洛呈疇占永奔竄舞那辭  
祗平成天地尤垂謙華嶽泰衡祇平定鬱塞昏徙  
逃禺嶮文章絢爛懸日月風雲呵護環屏黔君不  
見周原石鼓半已泐秦堦詛楚今皆殲此碑雖存  
豈易得障有嵐靄峯巘巖梵音夔絕柱藜藿吊影  
颯瑟森櫺櫺湘娥遺珮冷班竹山鬼結旗零翠蘇  
造物精英忌發洩祇恐羽化難留淹欲摹墨本鐫  
崖壁要使好事傳細縑著書重訂琳瑯譜裱帖新

耀瓊瑤籤麝煤輕翰蟬玃榻煩君再寄鹵飛鷄

讀神禹碑歌

劉汝南

吾聞岫嶺之山圖牒古神禹按之平水土元癸一  
夜發簡書海若天吳莫敢覩金符玉冊奏成功天  
地成平四海同未向會稽藏簡字先勒名嶽播神  
工衡山古鑄今明滅吊古雄才空填咽千秋萬載  
不復聞七十餘字誰稱說近年至寶出人間此碑  
乃落嶽麓山神物守護在蒼莽霜凌雨溜赤石班  
樵人亟見不相識太守聞之長太息披榛剔蘚歎



太奇豈是蒼冥移鬼力鬼力誰能移神理空自知  
鸞軒鳳舉翩跹下虎攫龍騰爭爲馳我嘗持之不  
能讀空堂一幅開岳瀆卽今倚石摹赤文海水欲  
翻泰山覆山阿含睇已無人洞庭蕭蕭落黃木

禹碑

崔應科

麓巔弁石壁蒼異映星雲象畫知何自螭文迥不  
羣由來天地秘未許鼎彝分已溺銘神遠瞻依思  
正殷

登禹碑亭懸望

石公允

爲覓神碑夏后銘丹梯陡絕屢迴經危峯拔地雄  
南楚遠水蟠天漾北溟縹爾城寰猶列俎飄朕身  
世此孤亭九州何處罡風吐環珮空疑拱萬靈

禹蹟亭讚

明吉宣王時奉命祭掃祖塋登山

勒讚

大哉神禹中天而興洪水方割懷山襄陵受帝明  
命夙夜匪盍九載疏鑿四海底平遺跡麓巔萬代  
崢嶸奚啻親覲華翰綸音稽首閱誦仰止儀刑

讀禹碑

朱士景

罡風挺護此神碑曠代依稀一見奇金簡不傳人  
已朽赤文空著石猶危週迴磨蟻蒸湘雨斑剝苔  
虬嶽鹿詩選勝頻來追往事隔江漁火動歸騎

禹碑

車以遵

嶽麓岫嶁孰假真數行深見水精神辛壬癸甲無  
多日泥橈舟車載一身蒼水元彝曾授簡宣房漢  
帝但沉薪黃虞遠矣思明德北海碑前說主臣

讀禹碑

吳 愷

神碑搜嶽頂竹杖引罡風入耳疑天語驚眸託鬼

工嵐光搖碧落江色澹沉空不盡低回處安瀾萬  
世功

讀禹碑

吳愉

絕磴穿空出摩娑禹蹟真雲流詳體致波折認形  
神註腳翻滋臆原頭直可詢山靈關顯秘竟古自  
如新

讀禹碑

陳熒

躡磴披嵐意渺然遙疑身在碧雲天孤帆的的平  
沙鴈遠樹離離隔暮烟蝌蚪何年開勝蹟河山猶

自壯遺編懸知此會情無極多恐閒心愧昔賢

望峒嶠碑

朱君壽

金泥玉檢授馮彝蚪蚪文章古篆奇欲叩水經探  
禹蹟峒嶠石窟認殘碑

讀禹碑

胡爾愷

崔嵬欲近天門影古色臨空照翠巒飛磴星躔開  
百丈危湍壁落掛千盤蒼虬霧濕霏青玉鬼谷風  
寒駕赤鸞獨上振衣悲斷碣涼生海色路漫漫

過嶽麓登禹碑亭絕頂同揚仲宣郭幼隗吳

去慵馮根公周聖生

簡徐芳

拂衣穿翠磴盤礴出雲霄不毀千春石更呼幾代  
樵字摩蒼蘚駁亭望古城搖漁渡烟波上先晴未  
覺遙

國朝

摹刻禹碑于大別山城

毛會建

天地有大文嶽瀆走萬里天地有至文蝌蚪分十  
指人知造化功不知䟽鑿理亦聞鬼神泣不聞呵  
護此大矣神禹碑一篇治水紀參身鳥獸門欽哉

承帝旨遑遑嶽麓庭鬱塞昏成徙嶽瀆得其位萬  
國多受祉回首羽山陰功臣而孝子其字七十七  
一字將一咫形模大奇特結譔無定止拳蜩與倒  
蕪落落差堪擬顧公具卓識云乃法流水譯文有  
三家用修說近是碑在峒嶺峯崔嵬白雪裏高萬  
八千丈凡蹤不可跂藤葛久封埋蒼碧滋內美韓  
張號眈奇披尋亦徒爾不意何賢良樵豎相引使  
攀巖還越澗一見生狂喜市厯慎臨摹體畫皆逼  
似他日重追尋迷不復見矣爰刻嶽麓山舊觀抑

何侈駸駸千百年駸泐成亥豕雲霧覆其頂虎豹  
踞其趾竭誠事祭告乃得一錯趾神物相護持赫  
赫良有以予登衡嶽巔努力還至彼懸梯作鉤填  
意象宛在紙凜凜不敢留歸舟快無比寢食與周  
旋晨昏爲尊禮荏苒兩春秋私心不自揣還刻大  
別山髣髴稱具體有譯復有跋其幅差小耳憶昔  
導水時大別禹所抵山高而水長精英常疊疊况  
當名勝地遊觀徧遐邇四千年來物從此其人鬼  
江漢繞烟波瀟湘結蘭芷礧礧一片石亦與水終



前題

顧龍裳

皇哉天地始作經操筆不知誰氏史蟲鳥跡傳金  
玉書禹功昭錫無疆祉大文閣歲凡幾于原本應  
先謨典祀咄咄毛子特好奇生而嗜古真如飴飶  
笠周身托人外山川精爽開心脾知者謂司神化  
府不知者曰雲水癡祝融峯高炎帝額絕地九千  
三百丈潛夔秘恠陰霧封俗物徘徊不敢上毛子  
煉骨如霜烟手攀藤蘿足躡泉出沒青冥逐魍魎

翻身直到神君前夜半起看紅日煜海霞摩盪廻  
賜谷更招紫蓋訪元羹岫嶠峯頭拓胸目晶光能  
抉罔象幽衡陽之雲一瞬收十九年垂七十字精  
嚴威寶良難讐毛子拂拭再審視意象經營鬼物  
愁不覺躊躇遂滿志作者元氣來相求膽過于身  
神在腕重若周鼎輕吳鉤如驚斯擎鳳斯舉如虎  
斯嘯龍斯遊法力奇巧更奇變是豈人功之所侔  
大別山頭一片石蝌蚪森森映波赤北地英靈至  
自南神鰲守護終無射

前題

嘗默

天荒劈破古甕邈浩劫空旋失稚老兩間草昧開  
文明橫流匝地如烟掃尼父刪書自唐虞二典龍  
從發奇皦荒度八載歸禹功四瀆五嶽青矯矯傳  
聞南徐炎帝鄉岫巘山雲鑄潔皎洸養七十餘字  
模李斯細兒不克討祇識其八頗遷踈龍護龜伏  
霸光宵千年萬年苔花班剝落蒿藤費訂考倉頡  
已死羲皇崩史籀石鼓空表表科蚪寒鱗蝕陰霞  
一片虛白穿蕪縞不知石紐渺何從霧突日寫嘗

堅好祝融峯高火龍犇粘天墨色衡柳繚元爨使  
者捧精晶金蠹玉函壽而保已見九鼎禦魑魅更  
此辟兵殊傾倒忽朕毛公要領奇輕砂大石鋤梨  
棗異書探盡懷抱高手筆規恢製神巧象誕鐘王  
心血枯對之野燒焚瑤草嶽麓移于大別巔糾蟠  
崑崙郤洲島怪雨酸風掣蛟螭菁華不竭天地寶  
寄言黃鶴與白雲蒞宮石室須臾小

毛子霞臨禹碑縮篆刻石大別山和諸公詩

陶汝鼎

河圖用七居南午龜負靈文作書祖南嶽峯頭治  
水碑坎離交孕文用古七十七字竹書前萬八千  
丈朱陵天嶽靈閣秘徙於麓飛來壁亦封蛟涎毛  
公治詩兼治書縱觀禹蹟搜蟲魚被榛大叫手摹  
畫蚪斗競落神有餘載過湖心照江水蝦蚶視龍  
波不起靜中鈎勒如印泥鬼斧巉巖透生紙携來  
大別琢青琅蛟螭小縮姿橫陳有如九鼎夏初鑄  
萬象攝入爐冶新此事非關巨靈作子霞嗜古思  
河雒龜峯還似負書時七七衍圖元白鉤勒廻南

紀莫滔滔千載江臯振衡霍

毛子霞摹刻禹碑于大別山 夏嘉瑞

何年神物顯晦非偶明德玄圭此外無有天作毛  
公四千年後如燈能傳如允能守蛇虎荆榛其來  
已久鈎勒猛悍靈威憑肘昔嶽麓庭今大別首河  
山重輝斗星無茹電走雷奔百億萬壽

前題

郭金臺

衡嶽古峯七十二高文獨重神禹碑天下奇士謗  
麗筆就中見者心欽持或云碑在峒嶠穴拳科倒

薤工摹碣云何紀宿嶽麓庭四字不磨山不滅我  
昔讀書山半寺窈窕一窓雲嫵媚清秋時見立鹿  
遊胎息碑庭護奇字神物之傳繫兩公前歸楊公  
今毛公楊公辨識有具眼一洗俗學開朦朧卓哉  
毛公更才傑手勒其文置大別鐫篆大篆列小碑  
班駁龍螭擅其絕由來古蹟非定本褻帖黃庭亦  
增損能事爭傳無古今匠意經營自深穩騷人并  
是瀟湘客覽徧三湘還七澤南國滔滔江漢流萬  
古長沙一片石

禹碑

沈一揆

平成績奏幾千年石壁遺文尙宛然  
豈是後人偏好事應知古聖示心傳  
龍蛇影動雲烟亂珠露光凝日月懸  
愧我讀書無萬卷空來擬議未能詮

禹碑亭

黃性震

翳管發河洛天地衍大文回溯一畫初  
混沌從此分昏墊苦未除方割憂正殷  
高山大川間荒度八載勤元圭迄告成  
績勒南衡君科斗七十七亭虛翁氣氤  
自足疏鑿理篆法流水紋斜蟠掣蛟螭  
剥



落老烟雲靈奇斯可怪劈闢電雷礮剝剝畱詮譯  
豎義如所云胡然紫霄峯六字僅有聞

拜禹王碑

朱前詒

我聞大禹治水坤道宜响嶺山上勒石銘蝌蚪篆  
文人莫識唐時道者昭其靈昌黎韓子推天寶托  
之翰墨彰肇造閭世至宋二百年此碑隱秘江山  
好宦宗嘉定歲壬申賢良何致才絕倫探奇尋訪  
入衡嶽摹出靈文驚鬼神携來嶽麓刊諸石見者  
聞者皆咋舌楊慎沈鎡譯其文夏后如椽七十七

從此碑篆四海推搨來敬奉鎮炎裁余亦何幸牧  
星渚今朝瞻仰躡崔嵬仄路峻山行易倦轉羨高  
飛鳥公回觸目頽亭有石壁齊心頂禮神禹筆讀  
之凜凜肌粟生更聽山人話雷擊洵平石上有裂  
紋始識靈奇赫顯蹟噫嘻再拜別禹碑褰衣徒步  
循迤逶清風拂拂飄輕綵白雲冉冉度層埤歸歟  
未盡登臨思坐看蒼霽月上時

峒嶼碑磴歌

李先登

攀峒嶼起長諠載陽春日是非碑前芳草爲誰

稀美人美人孟式微

岫嶠碑上莓苔戟岫嶠碑下村蘅碧美人美人何  
日歸水遠山長猶是憶

禹碑歌

趙 孟

吁嗟嶽麓今何獨七十二峯之一平一麓可以當  
全嶽吞吐日月凌虛無下有湘流映空碧上有蒼  
碑古篆神禹謨蟲書蝌蚪成點畫字青石赤爲形  
模手摹心維不能讀事嚴跡闕誠非誣憶昔堯咨  
舜傲平水土辛壬癸甲勞江湖元羹使者授簡策

海若不眠走天吳至今七十餘字垂萬載雲封苔  
蝕懸崖孤我家宛委之山下玉函石室藏金符宦  
遊此地覩奇蹟使我側身南望懷仙都龍騰鳳舉  
競馳驟人間何用尋方壺茲碑不啻希世寶精光  
倒射滄溟枯平成功奏闢天地盡幹黃熊九尾狐  
鬼神呵護石無泐直同河洛陳疇圖徘徊長嘯向  
天際但見洞庭秋靄飛蒼梧

長沙嶽麓山有石碑七十餘字傳是大禹治  
水過衡時所刻之石作禹碑詩

劉左光

流睇羽山陽水功禹所恥黃熊不戀山鯀罪死於  
水天傷孝子志金簡授蒼使洞庭來船橋奇文秘  
岳嶠榛莽數千年蒼碧紛內美羽隱合樵栖其才  
多高士不然此神物遭遇何秘詭韓張仕宦人窮  
幽未必爾七十餘字中虎螭亦虛擬徘徊嘉定年  
驚飄市麻紙風雨天晦明封剝四百紀於爍昔肅  
皇龍御郢中起茲書亦乘運顯晦有妙理青字傳  
鳥爪寡昧說篆旨卓識顧尙書辨歸流水是劉議

洗秦灰眼光出亥豕焦思十三年皇哉夏后氏區  
區文字間亦與水終始

讀禹碑

羅才徵

麓峯高處探神碑絕壁摩娑古篆奇駭馭碧霞停  
赤帝策陳蒼水授元彝千秋蝓蚪侵風雨一片琅  
玕列虎螭却憶平成當日事坐看雲海漫支願

讀禹碑

余瑜

拂拭殘雲讀禹碑平成還憶錫圭時三湘永奠湖  
南水八載弘開大夏墓字挾風霜鳴虎豹文成珠

平走蛟螭於今不共乾坤老百劫重來共賦詩

禹碑歌

金德嘉

祝融莽蒼天溟濛神禹碑在岫嶂峯萬八千丈青  
芙蓉七十七字藤蘿封螺書匾刻崔融躋拳蚪倒  
薤森戈鋒韓劉蒐討殊難逢何物蜀士傳臨邛考  
亭南軒躋山衝千尋萬索心忪忪嗚呼此碑嶽麓  
重蟲如徂徠嗣岱宗何君勒石依蒼松其下殷殷  
蟠蛟龍誰肯疏鑿洲渚壅叅身鳥跡無春冬南濱  
衍亭初畊農萬世永賴隨刊庸我行望嶽期扶筇

墨本摸抄開心胸洞庭雨過濤溶溶風飄燁燁  
細濃潛屈祕笈神靈鍾凌晨好放湘江柳

讀禹碑

趙志夔

岫嶠盤根險神工幻跡遙登臨千嶂近想象百川  
朝夜月亭俱迴秋風雲自消何當攀磴道天路駕  
扶搖

岫嶠碑

盧

震

五華

片石千秋頌禹功嵯峨望處盡烟籠乾坤德洽依  
瞻遍文字風遙想像中繞繞白雲封有據班班青



蘇覆能王湖湘蒼赤茲何幸已溺猶傳在嶽麓